

ს დ ა ს უ
საქართველოს დავით აღმაშენებლის სახელობის უნივერსიტეტი



დაცვისა და უსაფრთხოების სამსახურის დებულება

მუხლი 1. ზოგადი დებულებანი

1.1 შპს საქართველოს დავით აღმაშენებლის სახელობის უნივერსიტეტის (შემდგომში – „უნივერსიტეტი“) დაცვისა და უსაფრთხოების სამსახური (შემდგომში – „სამსახური“) წარმოადგენს უნივერსიტეტის სტრუქტურულ ერთეულს, რომელიც თავის საქმიანობას წარმართავს „უმაღლესი განათლების შესახებ“ საქართველოს კანონის, უნივერსიტეტის დებულების, წინამდებარე დებულებისა და საქართველოს მოქმედი კანონმდებლობის შესაბამისად.

1.2 დაცვისა და უსაფრთხოების სამსახური მოქმედებს უნივერსიტეტის მთელს ტერიტორიაზე.

1.3 დაცვისა და უსაფრთხოების სამსახურის საქმიანობის სამართლებრივი საფუძვლებია საქართველოს მოქმედი კანონმდებლობა, წინამდებარე დებულება, უნივერსიტეტის დებულება და შინაგანაწესი.

1.4 დაცვისა და უსაფრთხოების სამსახურის თანამშრომელი უნივერსიტეტის აკადემიურ/მოწვეულ/ადმინისტრაციულ პერსონალთან, სტუდენტებთან და მოქალაქეებთან ურთიერთობის დროს მოქმედებს ზოგადი ეთიკის ნორმების შესაბამისად.

1.5 სამსახური თავისი კომპეტენციის ფარგლებში ასრულებს უნივერსიტეტის რექტორის მიერ კანონმდებლობის საფუძველზე დაკისრებულ მოვალეობებს და ანგარიშვალდებულია მის წინაშე.

მუხლი 2. დაცვისა და უსაფრთხოების სამსახურის ფუნქციები

2.1 დაცვისა და უსაფრთხოების სამსახურის ფუნქციებია:

ა) უნივერსიტეტში წესრიგის დაცვისა და სახანძრო უსაფრთხოების, აგრეთვე უნივერსიტეტის პერსონალისა და სტუდენტთა უსაფრთხოების უზრუნველყოფა უნივერსიტეტის ტერიტორიაზე ყოფნის პერიოდში;

ბ) უნივერსიტეტის შენობისა და ინვენტარის დაცვა;

გ) ვიზიტორების შენობაში შემოსვლისა და გასვლის კონტროლი;

დ) უნივერსიტეტის შინაგანაწესის დარღვევის გამოვლენა და შესაბამისი ღონისძიებების განხორციელება;

ე) უცხო პირთა შემოსვლის აკრძალვა უნივერსიტეტის შენობაში;

ვ) სპეციალური საგანმანათლებლო საჭიროებების მქონე სტუდენტების დაწესებულებაში თავისუფალი ორიენტაციის, გადაადგილებისა და სხვა მომსახურების გაწევის უზრუნველყოფა;

ზ) უსაფრთხოების მექანიზმებთან დაკავშირებული სხვა ფუნქციების შესრულება;

თ) უნივერსიტეტში დაცვისა და უსაფრთხოების უზრუნველყოფის მიზნით სხვა უფლებამოსილებების განხორციელება და რექტორის ცალკეული დავალებების შესრულება.

2.2 სამართალდამრღვევთა წინააღმდეგ ბრძოლისა და პროფილაქტიკის საკითხებში უნივერსიტეტის დაცვისა და უსაფრთხოების სამსახური კანონით დადგენილი წესით თანამშრომლობს სამართალდამცავ ორგანოებთან.

მუხლი 3. დაცვისა და უსაფრთხოების სამსახურის სტრუქტურა და თანამშრომელთა უფლებამოსილებები

3.1 უნივერსიტეტის დაცვისა და უსაფრთხოების სამსახურისათვის განსაზღვრული თანამდებობებია: სამსახურის უფროსი და დაცვის თანამშრომლები.

3.2 დაცვისა და უსაფრთხოების სამსახურს ხელმძღვანელობს დაცვისა და უსაფრთხოების სამსახურის უფროსი.

3.3 სამსახურის უფროსი:

3.3.1 შეიმუშავებს უნივერსიტეტის დაცვის უზრუნველყოფისთვის აუცილებელ სამუშაოებს და მათი განხორციელების მექანიზმებს;

3.3.2 თავისი კომპეტენციის ფარგლებში ორგანიზებას უკეთებს ოპერატიულ თათბირებზე განსახილველი საკითხების მომზადება-განხილვას;

3.3.3 კოორდინაციას უწევს და წარმართავს დაცვისა და უსაფრთხოების სამსახურის საქმიანობას და ხელს უწყობს სამსახურის ეფექტურ მუშაობას;

3.3.4 თავისი კომპეტენციის ფარგლებში, საჭიროების შემთხვევაში ატარებს სამსახურებრივ მოკვლევას;

3.3.5 უნივერსიტეტის რექტორთან შეთანხმებით უზრუნველყოფს დაცვისა და უსაფრთხოების სამსახურის შეთანხმებულ და კოორდინირებულ მუშაობას ქვეყნის სამართალდამცავ ორგანოებთან;

3.3.6 დაცვისა და უსაფრთხოების სამსახურის საქმიანობის გაუმჯობესების მიზნით წარუდგენს უნივერსიტეტის რექტორს წინადადებებს.

3.4 დაცვის თანამშრომლების ფუნქციაა:

3.4.1 სამსახურის უფროსთან შეთანხმებული სქემის შესაბამისად განხორციელონ დღის განმავლობაში ობიექტების შემოვლა-შემოწმება და მისი კონტროლი;

3.4.2 დროულად გამოავლინონ და აღკვეთონ დაცვისა და უსაფრთხოების სამსახურში არსებული ანდა შესაძლო ხარვეზები;

3.4.3 ხანძარსაწინააღმდეგო ინვენტარის, კერძოდ, სახანძრო ონკანების, ცეცხლმაქრების და სხვა ხანძარსაწინააღმდეგო საშუალებების მუდმივად გამართულ მდგომარეობაში ქონა;

3.4.4 სახანძრო უსაფრთხოების კუთხით საქართველოს კანონმდებლობით დაკისრებული სხვა ფუნქციების განხორციელება;

3.4.5 დაცვის ტექნიკური საშუალებების: ვიდეომეთვალყურეობის და სასიგნალიზაციო სისტემების მონტაჟი/დემონტაჟი;

3.4.6 დაცვის ტექნიკური საშუალებების სწორ ექსპლუატაციაზე ზედამხედველობა;

3.4.7 უსაფრთხოების მიზნით უნივერსიტეტის ობიექტების გარე და შიდა განათების ნორმალურ მუშაობაზე კონტროლი და ხარვეზის აღმოჩენის შემთხვევაში დროული რეაგირება.

3.4.8 სამსახურის უფროსის სხვა მითითებების შესრულება.

3.5 დაცვის თანამშრომლების მოვალეობები:

ა) განუწყვეტლივ იმყოფებოდეს უნივერსიტეტის შენობაში, ყურადღებით, აკონტროლოს კორპუსი, ელექტროდამცავი და სახანძრო სიგნალიზაციის მუშაობა, კარგად იცოდეს კორპუსში აუდიტორიებისა და კაბინეტების განლაგება და თავისებურებანი.

ბ) დაიცვას უნივერსიტეტის ქონება დაზიანებისაგან, გამარცვისაგან, ხანძრისაგან ან სხვაგვარი საფრთხისაგან;

გ) სამსახურში ყოფნისას დაიცვას შინაგანაწესი, ეთიკის ნორმების შესაბამისად მოიქცეს უნივერსიტეტის პერსონალთან, სტუდენტებთან და უნივერსიტეტში სტუმრად მოსულ პირებთან ურთიერთობაში;

დ) უნივერსიტეტში შინაგანაწესის შესაბამისად აღკვეთოს ნებისმიერი დარღვევა, მათ შორის, კორპუსში ალკოჰოლური სასმელების შემოტანა, თამბაქოს მოწევა, აზარტული თამაშები, არ დაუშვას საკანონმდებლო ბრუნვიდან ამოღებული ნივთების შემოტანა.

ე) მკაცრად დაიცვას და სხვასაც მოსთხოვოს დაიცვას სახანძრო უსაფრთხოების წესები, რომლებიც გამორიცხავენ ხანძრებისა და აალების შემთხვევებს;

ვ) სამუშაო საათების დასრულების შემდეგ, შესაბამის უფლებამოსილ პირთან ერთად შეამოწმოს უნივერსიტეტის შენობა, დარწმუნდეს კორპუსის დაცულობაში, სიგნალიზაციის გამართულ მუშაობაში და ჩაიბაროს კორპუსი;

ზ) საჭიროების შემთხვევაში მოქალაქეებს აღმოუჩინოს გადაუდებელი პირველადი დახმარება;

თ) დანაშაულებრივი ფაქტების აღმოჩენის, კონფლიქტური სიტუაციების ან სხვა გართულებების შემთხვევაში მყისიერად აცნობოს უსაფრთხოების სამსახურს;

ი) შეასრულოს ხელმძღვანელობის სხვა მითითებები.

3.6 დაცვისა და უსაფრთხოების სამსახურის თანამშრომელთა დისციპლინარული პასუხისმგებლობის საკითხები განისაზღვრება უნივერსიტეტის დებულების, შინაგანაწესის და წინამდებარე დებულების შესაბამისად.

მუხლი 4. დაცვისა და უსაფრთხოების სამსახურის თანამშრომელთა ძირითადი შეზღუდვები

4.1 უნივერსიტეტის დაცვისა და უსაფრთხოების სამსახურს აქვს სპეციალური ფორმა განმასხვავებელი ნიშნებით.

4.2 უნივერსიტეტის დაცვისა და უსაფრთხოების სამსახურის თანამშრომლებს ეკრძალებათ სამსახურებრივი საიდუმლოების შემცველი ინფორმაციის გამჟღავნება, გარდა კანონით გათვალისწინებული შემთხვევებისა.

მუხლი 5. სამსახურის რეორგანიზაცია და ლიკვიდაცია

სამსახურის რეორგანიზაცია და ლიკვიდაცია ხორციელდება უნივერსიტეტის აკადემიური საბჭოს გადაწყვეტილებით რექტორის ინდივიდუალური ადმინისტრაციული-სამართლებრივი აქტით.

მუხლი 6. დებულებაში ცვლილებებისა და დამატებების შეტანა

დებულებაში ცვლილებებისა და დამატებების შეტანა ხორციელდება სამსახურის უფროსის მიერ მომზადებული მოხსენებითი ბარათისა და იურისტის მიერ მომზადებული ცვლილება - დამატებების საფუძველზე. ცვლილებათა პროექტს ამტკიცებს უნივერსიტეტის რექტორი.

